

**Date – 28/12/2025**

**Time - 18:30 -18:40Hrs**

**AKASHVANI AIZAWL**

**HEADLINES ( EVENING )**

1. Home Minister Pu K. Sapdanga'n chuan Krismas Urlawk ni a Assam a Krismas inbuatsaihna tibuai zawnga misualte chetna chu na taka a dem thu a sawi.
2. Kumin a Pathianni hnuhnung ber vawiin kha Mizorama kohhran hrang hrangte chuan Sande Sikul kai tha lawmman semna ni atan an hmang.
3. Myanmar sipaite'n Falam township a beihpui an thlak avangin Champhai district-a Vaphai khua-ah raltlan 89 an rawn lut.
4. Prime Minister Narendra Modi-a'n kumin chhung hian India-in khawi kipah hnuhma langsar tak tak a hnutchhiah thei zel a ni, a ti.

<><><>

**CONDEMNATION**

Home Minister Pu K. Sapdanga chuan Krismas Urlawk ni a St. Mary's School, Panigaon, Nalbari District, Assam a Krismas inbuatsaihna tibuai zawnga misualte chetna chu na taka a dem thu a sawi.

Hemi chungchangah hian thuchhuah siamin Pu K. Sapdanga chuan Krismas hun thianghlim tibuai a chetna hian a rilru a tibuai-in a tina hle tih a sawi a. Hetiang thil thleng hian India rama sakhaw zalenna leh sorkarin sakhaw tihbik a neih lohna lungphum a kalh tlat a, a na thei ang bera dem tur a ni a ti a, mipui sorkarna ramah hetiang hian hmun a chang tur a ni lo a ti. Krismas chu inremna hun leh khawngaihna leh lainatna lan chhuahtir hun a ni tih sawiin hnam leh sakhaw hrang hrangte inpumkhatna tichhe zawng leh mite rikrap zawnga chetna thleng chu pawm theih loh leh thil tha lo tak a ni a ti. Assam sorkar thuneitute'n rang tak leh khauh taka hma la nghal a, pawikhawihntute man an nih nghal avangin lawmawm a tih thu Home Minister chuan a sawi a. Dan rorelna chuan a tihtur a ti ang a, he pawikhawihna a mawhphurtute chuan dan angin hremna an tawk ngei tur a ni ang, a ti.

Pu K. Sapdanga chuan mitin leh sakhaw hrang hrang betute chu an nihna inzahsak tawn a, inpumkhat chunga inhriatthiam tawinna nei turin a chah a. Remna leh muanna, inlungrealna leh inunauna chu hmarchhak bial kaihruaitu leh thupui ber ni reng se a duh thu a tarlang bawk.

Mizoram Pradesh Congress Committee (MPCC) president Pu Lal Thanzara pawhin Mizoram a kum 2025 Krismas hlim taka lawm a nih laia India ram State hrang hranga BJP kaihhruai pawl - VHP, Bajrang Dal leh RSS ten Krismas lawmna an tibuai chu na taka a dem thu a sawi.

Pu Lal Thanzara chuan Krismas lawmna tur cheimawi zawrh an suasam ni a sawiin, chei tawh sa tichhiain Krismas carol te tibuaiin an rikrap nasa hle a ni a ti a. Hei hi Mizoram Pradesh Congress Committee chuan a pawl a tiin a ngai thutak hle tih He tiang thil hi thleng tawh lo hram se, a duh tak zet a ni, a ti. He'ng BJP Wing ti a a sawite hi BJP Sorkarna State-ah an che na bik hle niin a sawi a. Mizoram thenawm Assam State-a Nalbari District-ah pawh St. Mary's School in Krismas an lawmna tura an inbuatsaihna zawng zawng pawh suasam sak an ni a. Hetiang hian India ram State hrang hrangah Kristiante rikrap zawngin BJP Wing, RSS, Bajrang Dal leh VHP te chu na takin an che a ,Krismas carol-a kal naupang thlengin an sawisak rawn niin a sawi bawh.

MPCC president chuan India ram chu sakhaw intluktlanna ram tiin chhuang taka sawi thin a nih lai-in BJP in Sorkarna an chan atangin Kristiante tihduhna hi a kum telin a pung chho a ni a ti a. Nikum 2024-ah pawh khan India rama Kristiante tihduhna hi vawi 834 lai a thleng nia sawiin , BJP Sorkar hnuaiah India ram hi Secular State a nihna hi a bo tial tial a, Kristiante nekchepna a nasa tulh tulh a ni, a ti.

MPCC chuan India ram hmun hrang hranga RSS, Bajrang Dal leh VHP ten Kristiante chungah kutthlak a, an zalenna rahbehsak an ni chu a dem tak zet thu leh Kristian zinga kut tuar zawng zawngte a lainat tak zet tih a sawi a. Tun hi, ringtu, Kristian nihna anga tanrual hun a nih thu sawiin he thil thleng avang hian Mizorama Political Party zawng zawngte pawhin he thila a mawhphurtu BJP chu an thlawpna zawng zawng chhu chat vek turin a ngen nbawh a ni.

<><><>

LAST SUNDAY SCHOOL

Kumin, 2025 a Pathianni hnunhng ber vawiin kha Mizorama kohhran hrang hrangte chuan Sande Sikul kai tha lawmman semna ni atan an hmang.

Pathianni chawhma sande sikul kai kim vek bakah kohhran thenkhat chuan vawi khat emaw vawi hnih emaw kai lo te hnenah lawmman pahnihna leh pathumna an pe bawh. Presbyterian kohhran chuan kum 10 chhung a zawna Sande Sikul kaikim hnenah Pi Zaii Medal an hlan thin a, kum 15 a zawna kai kim hnenah Pi Zaii Medal Special an pe bawh thin a ni. Mizoram Baptist Kohhran pawhin vawiin khan tualchhung kohhran hrang hranga Pathian biak inkhawmah sande sikul kai kim tha lawman an sem a, chawhnu lamah zaikhawm a hun hmang an awm bawh a ni.

Mizoram Presbyterian Church website a tarlan anih danin Presbyterian kohhran Sande Sikul hi Zosaphluia (Rev. D.E. Jones) khan kum 1898 February ni 20-ah a din a. Kumin Mizoram MSSU reportah chuan Presbyterian kohhran hnuaiah hian Sunday School 1,035, Hotu 6,031, Zirtirtu 55,480 leh Zirtu nuai 4, sing 2, sang 7 leh 261 awmin, hming ziaik zawng zawng mi nuai 4, sing 8, sang 8 leh 772 an awm mek a ni.

<><><>

GRAVE DIGGING

Vawiin khan Khawbung khua chuan mitthi an neih avangin thlan lai mi 300 chuang an thawkchhuak.

Akashvani Correspondent hena Khawbung Val upa Pu Liandula sawi danin vawiina mitthi thlan lai an tam nachhan chu Val upa te'n tlangval te chu ko kim taka thlan laia thawkchhuak tura an ngen avang leh infuihna thu tam tak sawi tur a awm avanga thawkchhuak tam an nih thu a sawi a. Hei hi kum tawp a nih avang leh thalaite fuihna hun atana an hman hun a nih vangte lal lal lai hun atanga Val Upa la

nei chhonzawm ta reng an nih avangin, Tlangval rualte hian Val Upate thu an zawm tha-in an thu an awih em em niin a sawi a ni.

Khawbung khuaa mitthi vawiina an vuiliam tak hi , Pu PC Lalawmpuia nupui Pi Lalawnthangi Kum 39 niin Khawbung Dinthar Venga khawsa an ni a. Pi Lalawnthangi hi Myanmar Mangkheng khuaah piangin kum 2002 khan Khawbung ah pasal a nei a, fanu pathum a nei a. Pi Lalawnthangi hian zun thlum leh thisen sang a nei a. Thi put reh thei lo avanga Khawbung Damdawiinah Zirtawpni khan hruai ani a, Doctor in Champhai District Hospital a kal tura rawnin nimin chhun dar 1 vel khan Champhai district hospital-ah a thi a ni. Pi Lalawnthangi hi mi zawng zawng nel chi, mi hlim thei tak leh tupawhin an fiam bawrh bawrh ngam mi nia thudawn a ni.

<><><>

**AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

**REFUGEES**

Vawiin December ni 28-a Myanmar sipai sorkarin tihluhna a inthlan a buatsaih tum vanga Myanmar sipaite'n Chin state-a Falam township ah beihpui an thlak avangin Champhai district-a Vaphai khua-ah raltlan 89 an rawn lut.

Raltlan lo lut hmasa ber chu November ni 28 zan khan Tiau lui kanin Vaphai khaw per Saikhumphai-ah an rawn lut tan a. Anniho hi chhungkaw 11 a mi 47 an ni a Falam township huam chhunga K. Haimual khua ami an ni ber a, a bul hnai khaw thenkhat ami an ni bawk. Tun hnai khan Falam township huamechhung ami tho Hrumhrang khaw mi 42 an lo lut leh a, Vaphai khawtlang hruaitute chuan Fiaratui Middle School-ah an dah khawm a. January ni 7 atanga sikul kai tan leh tur a nih avangin an dahna hi sawn a ngai dawn niin an sawi. Hrumhrang khua hi Falam leh Halkha inkara awm a ni a. K. Haimual leh Hrumhrang khua-te hi Chin National Defence Force (CNDF) mipui sipai kuta awm lai, Myanmar sipaite’n laklet tuma nasa taka an beihte a ni.

Raltlante’n an sawi dan chuan an khua hi Myanmar sipaite hian indo thlawhna – jet fighter leh gyrocopter bakah drone hmangin bomb nen van lam atangin an bei hmasa phawt a, chu chu lei lam sipai-in an zui ta thin a ni. Raltlante hian an in leh lo, thlawhhma leh an ran vulh zawng zawng an tlansan a, engtin nge an awm tak tih pawh a hre zui tawh lova. Fa nausen leh naupang thahnem tak an rawn tlanchhiatpui a zirna lam leh kawng hrang hranga an hmabak tur an ngaihtuahin an rilru a hah tak meuh a ni.

Myanmar sipai sorkar hian Chin state-ah vawiin khan Tedim leh Halkha township-ah inthlan a buatsaih lui a, Thantlang, Tonzang leh Falam township-ah te thla thar ni 11 khian tihluhna bawka buatsaih leh a tum a. Hemi avang hian vote thlak lo ngam lo tura mipui rikrap na’n leh an tlanchhiatsan Chin silai keng pawlte awp khuate lalet leh tur hian October thla chawhnu lam atang khan Kalaymyo lam atangin sipai tam tak a tir chho a. Chin silai keng pawlte’n lo bei letin hmun tam takah indona nasa tak a thleng mek a ni.

<><><>

**MANN KI BAAT**

Prime Minister Narendra Modi-a’n kumin chhung hian India-in khawi kipah hnuhma langsar tak a hnutchhiah zel, a ti. Vawiin Akashvani-a Mann Ki Baat hun a hmanna-ah he thu hi sawiin Pu Modi-a chuan kum 2025-ah India mi zawng zawngte tana chhuanawm, thil chi hrang hrang a thleng a ni, a ti a, Operation Sindoor chu India mi-te thilunga thil chhuanawm chhinchhiahna a ni tih sawiin India-in ramchhung himna tiderhawng thei thil a hmachhawn dan, khawvelin a hriat phahna a ni, a ti bawk.

Pu Modi-a chuan Sports lamah pawh 2025 chu kum chhinchhiah tlak anih thu pawh sawiin India mipa cricket team-in ICC Champions Trophy an la a, a vawi khat nan india hmeichhe cricket team chu World Cup champion an ni, a ti a, Women’s Blind T20 World Cup-ah India fanute champion-in khawvel pum huap, pianphunga rualbanlote inelnaah India aiawhten medal engemawzat an rawn hawn bawk a ni, a ti.



**FOG DISRUPTS AIR/TRAIN SERVICES**

Tiau chhum chhah tak zing vangin vawiin khan ramchhung hmar lam bialah thlawhna leh rel service a khaihlak nasa hle a, helai bial hi tiau chhum chhah takin a la bawh zui zel thei tih India Meteorological Dept chuan a sawi a ni.

Chhum zing vang hian rel 40 chu darkar engemawzatin an tlai phah a, rel thenkhat chu an tlan kawng tih danglam a ni. Thlawhna service pawh Delhi leh khawpui dangah a khaihlak nasa hle a, SpiceJet, Air India, IndiGo leh airlines dangte bakah Railway thuneitute chuan zin turte chu tumhmun emaw station emaw pana an chhuah hma-in an chuanna tur thlawhna leh rel dinhmun hrechiang hmasa turin an ngen a ni.

